



Obligation gegen Beyland der Königli-  
chen May. zu Schweden/ ohnsterblicher me-  
mori, Ih. Churf. Durchl. zu Sachsen.  
de dato Torga/ den 1. Septembtis, Anno 1631.

**W**IR GOTTES Gnaden Wir Johann  
Georg/ Herzog zu Sachsen/ Göllich/ Cleve vnd Berg/  
des H. Röm. Reichs Erzh-Marschall vnd Churfürst/  
Landtgraff in Düringen / Marggraff zu Meissen/  
Burggraff zu Magdeburg/ Graffe zu der Marck vnd  
Ravenspurg / Herr zu Ravenstein/etc. Vhrkunden  
vnd bekennen hiermit vor Uns / vnser Churfürsten-  
thumben / vnd Lande / Demnach der General Graff von Tylli / wider  
alle gegebene Ursache / auch des H. Röm. Reichs hochverpoente ver-  
fassungen / insonderheit den Religion vnd prophan Frieden / Uns vnd  
vnser vnschuldige Land vnd Leut/ mit Feindlicher Macht vberzogen / vnd  
aber der Durchleuchtige Fürst / Herr GUSTAVUS-ADOLPHUS der  
Schweden/ Gothen vnd Wenden König/ Großfürst in Finnlandt/ Herr-  
zog zu Ehesten vnd Carelen/ Herr vber Ingermannlandt/ etc. Unser  
freundlicher Herr Oheimb vnd Schwager/ Uns/ auff vnser ersuchen/  
mit bey sich habender Armee/ vnd ferner Macht/ dawider zu succurriren,  
versprochen/ das wir seiner Königlichcn Würde/ darauff bey vnserm  
Churfürstlichen Wort/ vnd Christlichen Gewissen/hinge-  
gen folgender massen angelobet vnd verpflichtet gemacht.

Erstlich wollen wir Vnser Armee / so bald S. Königl. W. vber  
die Elbe setzen wird / zu der Ihrigen stossen/ vnd wider vorgemelte seiner  
Königl. W. vnd vnser Feinde conjungiren, vnd vor einen Mann ste-  
hen / in dem jenigen auch was mit einhelligem Rathe beschlossen / Ihre  
Königl. W. bey verrichtung der Execution, die völlige Direction in  
Handen lassen / vnd nach aller möglichkeit / Ih. Königl. W. gut achten

B

Uns